

Transparentnost treba da postane kolektivna praksa u BiH.

17.06.2015.- Tuzla: Centar za promociju civilnog društva (CPCD) organizovao je okrugli sto na temu: *Finansijska transparentnost organizacija civilnog društva (OCD) u BiH.*

Događaj je okupio nevladine organizacije iz Tuzlanskog kantona, gdje je naglašeno da transparentnost OCD ne karakterišu samo obavezni izvještaji prema donatorima, nego i informisanje javnosti o izvorima finansiranja, sistemu internih kontrola i predstavljanju rezultata i efekata rada. Finansijska transparentnost samo je dio ukupne odgovornosti jedne OCD.

Kako se OCD velikim dijelom finansiraju iz budžetskih sredstava, potrebno je harmonizovati raspodjelu sredstava i zahtjeve izvještavanja na svim nivoima vlasti. Ne upražnjavaju sve institucije procedure javnog poziva za dodjelu sredstava, dok određeni broj institucija ne vrši analizu učinaka i rada za doznačena sredstva, iako je to njihova obaveza. Ovim pristupom ostavlja prostor za zloupotrebe javnog novca.

Učesnici su zaključili da je finansijska i programska transparentnost svih strana u procesu bitna, a prvenstveno zbog pojačanog etiketiranja OCD, pretpostavljajući da se isključivo osnivaju radi trošenja donatorskih sredstava. Transparentnost treba da postane kolektivna praksa u BiH.

Kritički osvrt odnosio se i na same OCD, čiji izvještaji u nekim slučajevima više skrivaju nego pružaju informacije javnosti, što zajedno sa nedostatkom informacija o radu, dovodi u pitanje njihov kredibilitet i razumijevanje da zastupaju javni interes. Iako su primjeri korupcije i zloupotreba u OCD i dalje rijetki, percepcija javnosti govori suprotno.

Na skupu su definisani zaključci, koji će se zagovarati u okviru kampanje transparentnosti OCD:

- Odgovorna OCD mora biti transparentna u svom radu, spremna da prikaže programske i finansijske dokumente svim zainteresovanim javnostima, uključujući korisnike i donatore, a u svrhu javnog nadzora;
- Odgovornost OCD prema društvu se ne završava samo odgovornim ponašanjem prema okruženju već i aktivnim podsticanjem okruženja na odgovorno ponašanje. Neophodna je promovisati transparentnost;
- Zadatak OCD je da zahtijevaju i konstantno vrše pritisak na organe uprave da odluke donose kroz transparentne procese, stvarajući prostor za uključivanje građana;
- OCD trebaju biti spremne pozivati na odgovornost kompanije koje se ne ponašaju odgovorno prema zajednici;
- Ideja CPCD-a za uspostavljanje OCD registra, koji će omogućiti transparentno djelovanje je imperativ. Registar je predviđen za organizacije, koje će sveukupan rad i finansijske izvještaje ponuditi na uvid javnosti i donatorima.

Naredni okrugli sto će se održati u Banjaluci 24.6. 2015, kao nastavak serije ovakvih skupova, u okviru Projekta održivosti civilnog društva u BiH, kojeg finansira USAID.